

ISU

Amalkan konsep ukur baju di badan sendiri

PENGURUSAN kewangan merupakan aspek penting bagi memperoleh kehidupan yang lebih baik pada masa hadapan.

Ita juga merupakan langkah terbaik bagi mengelakkan diri daripada terjerumus ke dalam belenggu hutang sehingga diisytiharkan bankrap.

Dalam dunia yang materialistik pada hari ini, pengurusan kewangan meliputi amalan untuk berbelanja secara berhemah merupakan cabaran terbesar.

Pada 15 September lalu, *Kosmo!* melaporkan sebanyak 294,000 rakyat Malaysia terlibat dalam kes kebangkrutan yang aktif disebabkan sewa beli, kad kredit, pinjaman peribadi, pinjaman perumahan dan pinjaman sosial.

Ketua Pengarah Jabatan Insolvensi, Datuk Abdul Rahman Putra Taha dipetik berkata, berdasarkan statistik jabatan itu, sebanyak 70 peratus daripada kes kebangkrutan membabitkan mereka berumur 35 hingga 45 tahun.

Dianggarkan 18,000 hingga 20,000 individu diisytiharkan bankrap disebabkan pelbagai punca dalam masa setahun.

Pensyarah Kanan Fakulti Ekonomi dan Muamalat, Universiti Sains Islam Malaysia (USIM), Dr. Nuradli Ridzwan Shah Mohd.

Dali berkata, perancangan kewangan sangat penting agar perbelanjaan dapat dikawal berdasarkan jumlah pendapatan masing-masing.

"Semua orang perlu membuat perancangan belanjawan agar gaji yang diperoleh setiap bulan digunakan dengan bijaksana.

"Kita juga digalakkan menabung sekurang-kurangnya 10 peratus dan maksimum 30



RANCANG perbelanjaan dan buat simpanan pada masa hadapan. – Gambar hiasan

peratus daripada gaji agar ia dapat digunakan kelak pada waktu kecemasan, pendidikan dan pembelian aset," katanya ketika dihubungi *Kosmo!* baru-baru ini.

Beliau yang juga merupakan Felo Penyelidik Institut Pengurusan Harta dan Kewangan Islam berkata, setiap individu hendaklah memastikan ke mana wang dibelanjakan sama ada untuk membeli aset atau liabiliti.

Katanya, jika melibatkan pembelian berliabiliti seperti membeli kereta yang menyebabkan pengeluaran duit setiap bulan, kita perlu sedar bahawa ia akan menambah komitmen kewangan.

Justeru, orang ramai dinasihatkan supaya bijak mengenal pasti sama ada sesuatu perkata itu kehendak atau keperluan.

Mereka juga disarankan untuk membuat pinjaman yang baik seperti bertujuan menjalankan perniagaan supaya dapat memberi keuntungan pada masa akan datang.

"Keperluan merupakan perkara yang wajib dipenuhi untuk terus hidup seperti tempat tinggal, pakaian dan makanan.

"Kehendak pula pelengkap kehidupan agar manusia dapat hidup selesa dan seronok," terangnya.

Hutang

Sekiranya dibelenggu hutang, beliau menyarankan agar jangan lari daripada masalah tersebut tetapi menyelesaikannya dengan cara membayar hutang yang kecil dahulu.

Cara begitu membuatkan kita berasa bersemangat untuk membayar hutang dengan amaun yang lebih besar.

Sementara itu, **Pensyarah Kanan Jabatan Sains Kemasyarakatan dan Pembangunan, Fakulti Ekologi Manusia, Universiti Putra Malaysia, Prof. Madya Dr. Ma'rof Redzuan** berkata, gaya hidup masyarakat kita pada hari ini yang suka berbelanja mewah menjadi penyebab kepada bebanan kewangan.

Tambahnya, kita harus berpegang kepada

peribahasa atau konsep ukur baju di badan sendiri supaya tidak berbelanja melebihi kemampuan kewangan.

"Masyarakat kita merasakan perlu untuk memakai barangan berjenama dan tinggal di kediaman mewah

bagi menjaga status sedangkan gaji tidak mencukupi bagi menampung perbelanjaan yang besar itu.

"Mereka ingin nampak menarik di mata manusia dan selalu membandingkan diri dengan orang lain, malah kehidupan mewah itu sering ditayang di laman sosial.

"Kita tidak seharusnya memikirkan pandangan orang lain terhadap diri kita kerana ia boleh memakan diri.

"Kita perlu kembali kepada ajaran Islam yang menyarankan agar umatnya hidup secara sederhana namun ia bukan bermaksud enggan bersaing untuk mendapatkan kehidupan yang lebih baik," tuturnya.

Ma'rof berkata, usaha memupuk pendidikan perancangan kewangan haruslah dimulakan sejak kanak-kanak lagi yang boleh dipraktikkan di rumah dan sekolah.

"Mereka hendaklah diberi pendedahan mengenai pengurusan kewangan dan kepenggunaan agar ia menjadi amalan dalam kehidupan," katanya.



NURADLI RIDZWAN SHAH



MA'ROF

MASYARAKAT perlu bijak membezakan keperluan dan kehendak. – Gambar hiasan



PEMBELIAN aset berliabiliti bulanan seperti rumah perlu diukur dengan kemampuan kewangan. – Gambar hiasan